

PASIAN MINAM

Pasian in leitung vantung leh mihing ganhing akipan nakhem peuchte abawl pa hi ci-in, ei Christian te in i umhi. Mihing khempeuchte ama bawlsa leh ama aa vive hina pi-in, bangci bangin Pasian minam cih hongpiangkha thei hiam? Kua te in koici bangin Pasian minam hongsuak uhhiam? Tuhun in Pasian minam i cihding mite in kua mite hiding hiam? Bangci bangin tua mite Pasian minamthak te i ci thei dinghiam? Pasian minam te akici ding mite in bangci in Pasian tawh kizopna neiding uhhiam? Israel minam te in bangci bangin Pasian minam suak uha, tuhun ciangin kua mite in bangci bangin Pasian minam suakding uhhiam? Tuhun ciangin, minam khat in Pasian minam i hihi ci-in gen leh, aman taktak thu ahi thei dinghiam? Pasian zat minam i ci a, Pasian minam i ci ahi zongin, Pasian minam leh leitung minam bangci kizop in, bangci kisai dingin i ngaihsun hiam? Minam khatin Pasian minam ihihi ci leh, minamdang Pasian ummi tampi te in kua minam, bang minam hiding uhhiam?

Amau te zong Pasian minam mah naki ci uh leh, tua Pasian minam te leh Pasian minam ka hi uhhi aci eite, bangci kizop in, Pasian sungah minamkhat ihihna i ki langsak thei ding hiam? Tuhun ciangin bangtawh kiteh in, bangtawh i ki et ciangin Pasian minam i kici thei dinghiam? Pasian minam hih leh hihloh bangtawh tawikhai ding ihi hiam? Pasian Tapa Jesu a um amuang leh amah abia mikhempeuh Pasian minam hi dingin i um hiam? Tua bangin i upleh, Pasian minam i cih kuate hiding a, Pasian minam ahi lo kuate hiding hiam? Minam khat ii sungah zong Pasian Tapa Jesu honpa leh gumpa in asanglo mitampi omthei hi. Tua hi leh minam khat in ei minam in Pasian minam ihihi cileh, thuman gen hidingin i lamen ngam ding hiam? Banghanghiam cih leh tua minam sung mahmah ah Jesu a umlo mi tampi na om thei hi. Tua hi leh bangtawh ki ending ihi hiam?

Zomi te in Pasion minam ihihi, Pasion zat minam ihihi i cih ciangin, bang i gen nopna hiding in i lam en hiam? Zomi akici khempeuh in Jesu Topa asang leh a um te ihi takpi hiam? A um lo asang zolo om ahih leh, ei minam in Pasion minam ihihi ci a i gen ciangin, bang thu man leh bang thupha i mite ading omin i lamen hiam? Leitung minam khat leh Pasion minam i kibatsak na hangin (*to identify one tribe, race or nation with the People of God*), Pasion thutawh kisai ahi a, leitung thutawh kisai hita leh bangnawngkai na leh, bang hak satna omthei hiam cihthu i phawk ngitngit ding, thupi asa Zomi Christian bangzah om in i umhiam?

Laisiangtho lui hunlai in, Pasion minam akici Israel minam te in, Pasion minam akici lo minamdang te tawh bangci bangin a upna uhah ahi a, agamtatna uhah hita leh, kizop kivak na ahi a, nekna dawnna ah hita leh bangci bangin kilamdang uhhiam? Amau te in Pasion minam ahilo te tawh tuamun te ah kilamdanna nei uh ahih leh, tuhun Pasion minam i cihte (akici eite) in Pasion a umlo te tawh bang kilamdanna nei i sa hiam? Hih thute khat khithkat ngaihsun kawmin, Laisiangtho tawh etkak a, i gen thu, i zak thu, i zat kammal te ii khatna athak in phawk semsem, telsiam semsem ding thupi hi. I zatma in i zat kammal telding leh, i zak kammal atel te ihih ding i hamciam semsem ding hun sungah i lotta hi.